

Litir Naomh Pól chuig na

hEIFISIGH

1 Mise Pól, aspal Íosa Críost de dheoin Dé ag beannú do na naoimh (in Eifeasas) atá dílis i gCríost. **2**Grásta chugaibh agus síocháin ó Dhia, ár nAthair, agus ón Tiarna Íosa Críost.

3 Moladh le Dia,
le hAthair ár dTiarna Íosa Críost,
a bhronn orainn, i gCríost,
gach tabhartas spioradálta sna flaithis.

4 Roimh thú sú an domhain
roghnaigh sé sinn i gCríost
chun bheith naofa gan locht os a chomhair.

5 Le barr grá dúinn
leag sé amach ó thú
de réir mhian a thola féin
go mbeimisne inár gclann aige

6 trí Íosa Críost,
i dtreo go molfaí an grásta as cuimse



a roinn sé orainn go fras
ina Mhac muirneach.

⁷ Is sa Mhac sin,
as ucht a chuid fola,
atá ár bhfuascailt faighte againne,
maithiúnas ár gcionta,

⁸ de réir iomadúlacht an ghrásta
a roinn sé orainn go fial.

Le teann eagna agus gaoise
⁹ nocht sé dúinn rún a thola –
de réir an chuspóra a bhí leagtha amach aige ó thús
lena chur i gcrích i gCríost,

¹⁰ nuair a bheadh an t-ionú tagtha –
mar atá, an beartas
gach a bhfuil ar neamh agus ar talamh
a thabhairt le chéile faoi cheannas Chríost.

¹¹ Mar is i gCríost
a roghnaíodh sinne inár n-oidhrí
agus a leagadh amach dúinn,
de réir intinne an té úd
a oibríonn gach ní de réir chomhairle a thola féin,



- ¹² a bheith ar na chéad daoine
a chuirfeadh a muinín i gCríost
chun moladh agus glóire Dé.
- ¹³ Agus is i bpáirt leis a roghnaíodh sibhse freisin,
nuair a chuala sibhse briathar na fírinne
agus dea-scéal bhur slánaithe,
nuair a chreid sibh ann agus
gur buaileadh oraibh stampa an Spioraid Naoimh a bhí geallta.
- ¹⁴ Is éarlais an Spiorad ar ár n-oidhreacht
nó go bhfaighimid seilbh iomlán uirthi;
chun moladh a ghlóire.

Guí Phóil

¹⁵ Sin é an fáth, ón uair a chuala mé iomrá ar an gcreideamh atá agaibhse sa Tiarna Íosa agus ar an ngrá atá agaibh do na naoimh go léir, ¹⁶ nar stad mé ach ag gabháil buíochais le Dia ar bhur son agus ag cuimhneamh oraibh i m'urnaithe. ¹⁷ Bím á iarraidh ar Dhia ár dTiarna Íosa Críost, ar Athair na Glóire, spiorad na heagna agus na géarchúise a thabhairt daoibh chun go gcuirfeadh sibh aithne air. ¹⁸ Go soilsítear súile bhur n-aighe ar shlí go dtuigfidh sibh cad é mar údar dóchais daoibh bhur ngairm aige agus cad é mar oidhreacht fhairsing ghlórmhar atá aige i ndán don phobal naofa ¹⁹ agus ollmhaitheas na cumhachta a chuir sé i bhfeidhm ar ár son-na, creidmhigh – an chumhacht éachtach úd ²⁰ a



chuir sé ag obair i gCríost nuair a thóg sé ó mhairbh é agus chuir ina shuí ar a dheis sna flathis é ²¹ go hard os cionn gach ceannas agus údarás agus cumhacht agus tiarnas agus os cionn gach ainm dar féidir a ainmniú ní sa saol seo amháin é ach sa saol atá le teacht chomh maith. ²² Agus chuir sé gach ní faoina smacht agus cheap é, os cionn gach ní, ina cheann ar an Eaglais is corp dó ²³ agus arb í iomláine an té úd a líonann gach ní go hiomlán í.

Ó Bhás go Beatha

2 Lá den saol bhí sibhse marbh de bharr na gcionta agus na bpeacaí a chleacht sibh ² nuair a leanadh sibh bealaí an tsaoil seo agus nuair a ghéilleadh sibh do phrionsa ríocht an aeir, don spiorad úd atá ag gníomhú inniu féin i lucht na míréire. ³ Bhíomarna uile ar an mbuíon sin tráth, nuair a ghéillimis d’ainmhianta na colainne agus nuair a dhéanaimis riar na colainne agus a cuid smaointe. Bhí fearg Dé anuas orainne ó dhúchas chomh maith le cách eile. ⁴ Ach bhí Dia lán de thrócaire agus thug sé grá chomh mór sin dúinn ⁵ fiú amháin nuair a bhíomar marbh de dheasca ár gcionta, gur athbheoigh sé sinn in éineacht le Críost – is in aisce a slánaíodh sibh – ⁶ gur thóg sé sinn ó mhairbh in éineacht leis agus gur chuir inár suí sinn sna flathis in Íosa Críost, ⁷ d’fhonn a léiriú do na haoiseanna a bhí le teacht chomh hollmhór is a bhí stór a ghrásta agus a fhlaithiúlacht a bhí sé linne i gCríost Íosa. ⁸ Mar is le grásta a slánaíodh sibh, trí chreideamh. Ní uaibh féin é; is tabhartas é ó Dhia. ⁹ Agus ní de bharr oibreacha i dtreo nach bhfuil cúis mhaíte ag



duine ar bith. ¹⁰ Is dá dhéantús sinn mar gur cruthaíodh i gCríost Íosa sinn chun ár saol a thabhairt i mbun na ndea-oibreacha a bhí ullamh roimh ré dúinn ag Dia.

Is aon Sinn uile i bPáirt le Críost

¹¹ Cuimhní, dá bhrí sin, ar an mbail a bhí oraibhse tráth – sibhse na gintlithe ó dhúchas a raibh “lucht an fhorchraicinn” mar ainm oraibh ag an dream a thugadh “lucht an timpeallghearrtha” orthu féin, ag tagairt don mharc lámhdhéanta úd ar an gcolainn.

¹² Cuimhní go raibh sibh an uair úd ar deighilt ó Chríost, nach raibh aon chuid agaibh i stát Iosrael ná aon pháirt agaibh sna conarthaí ná sna gealltanais, go raibh sibh gan dóchas sa saol agus gan Dia féin. ¹³ Anois, áfach, tá sibh i gCríost Íosa; sibhse a bhí tráth i bhfad i gcéin, tá sibh tagtha i ngaire de bharr fhuil Chríost.

¹⁴ Mar is eisean ár síocháin; is é a rinne aon bhuíon amháin den dá phobal nuair a leag sé ar lár an balla deighilte, an naimhdeas ina cholainn, ¹⁵ agus chuir ar ceal an dlí agus a chuid aitheanta agus forálacha d’fhonn aon duine nua amháin a dhéanamh den bheirt ann féin trí shíocháin a dhéanamh eatarthu, ¹⁶ agus an dá bhuíon a thabhairt chun athmhuintearais le Dia in aon chorp amháin leis an gcrois ar ar chuir sé an naimhdeas chun báis. ¹⁷ Tháinig sé ag fógairt dea-scéal na síochána daoibhse a bhí i bhfad uaidh agus dóibh sin a bhí ina chónagar; ¹⁸ mar is tríd atá teacht againn araon ar an Athair faoi luí an aon Spioraid. ¹⁹ Dá réir sin ní eachtrannaigh ná coimhthígh sibh a thuilleadh ach comhshaoránaigh leis na naoimh agus baill de líon tí Dé. ²⁰ Is foirgneamh sibh a bhfuil na haspail agus na fáithe ina mbunsraith faoi agus Críost Íosa féin ina chloch chinn chúinne



aige. ²¹Is ann a nasctar an foirgneamh ar fad le céile agus éiríonn sé in airde ina theampall naofa sa Tiarna. ²²Is ann chomh maith atá sibhse do bhur gcomhthógáil agus áit chónaithe Dé á dhéanamh díbh faoi luí an Spioraid.

Misean Phóil

3 Sin é an fáth a bhfuilimse, Pól, agus mé i mo ghéibheannach ag Críost Íosa mar gheall oraibhse, gintlithe – ²tá iomrá cloiste agaibh, ní foláir, ar an gcúram a thug Dia mar ghrásta dom in bhur gcomhair ³agus mar a thug sé fios a rúin dom in aisling. Tá scríofa agam faoi seo go hachomair cheana ⁴agus má léann sibh é féadfadh sibh mo léargas-sa ar rúndiamhair Chríost a thuiscint. ⁵Níor tugadh fios an rúin seo do na glúinte daoine a chuaigh romhainn ach tá sé arna nochtadh ag Dia anois faoi luí an Spioraid dá aspail naofa agus dá fháithe. ⁶Agus is é rún é: gur comhoidhrí na gintlithe, gur comhbhaill den aon chorp iad agus go bhfuil siad comhpháirteach sa ghealltanais i gCríost Íosa tríd an dea-scéal.

⁷Rinneadh maor ar an dea-scéal sin díomsa nuair a bhronn Dia a ghrásta orm le héifeacht a chumhachta féin. ⁸Is mé an duine is dearóile de na naoimh go léir, ach is domsa a tugadh an grásta seo: saibhreas dochuimsithe Chríost a fhógairt do na gintlithe ⁹agus leagan amach an rúin a léiriú do chách. Bhí an rún seo folaithe leis na cianta i nDia a chruthaigh gach a bhfuil ann, ¹⁰i dtreo go bhfaigheadh tiarnais agus údaráis na spéire eolas anois tríd an Eaglais ar eagna ilghnéitheach Dé ¹¹de réir an bheartais shíoraí a chuir sé i bhfeidhm i gCríost Íosa ár dTiarna. ¹²Is é Críost a bheir dúinn a bheith teann de bharr



ár gcreidimh agus dul go muiníneach i láthair Dé. ¹³Impím oraibh, dá bhrí sin, gan bheith domheanmnach mar gheall ar na trioblóidí atá ag cur ormsa ar bhur son, mar is údar glóire daoibh iad.

Guí Phóil

¹⁴Sin é an fáth a dtéim ar mo ghlúine i bhfianaise an Athar ¹⁵óna n-ainmnítear gach clann ar neamh agus ar talamh. ¹⁶Go dtuga sé daoibh as ollmhaitheas a ghlóire go bhfaighidh sibh neart agus cumas inmheánach trína Spiorad, ¹⁷go gcónóidh Críost in bhur croí trí chreideamh, go mbeidh sibh préamhaithe agus bunaithe sa ghrá ¹⁸ar shlí go bhféadfaidh sibh féin agus na naoimh go léir fad agus leithead agus airde agus doimhneas [an ghrá] a thuiscint; ¹⁹go gcuirfidh sibh eolas ar ghrá Chríost atá os cionn tuisceana agus go líonfar sibh de líonmhaireacht iomlán Dé. ²⁰Glóir don té úd ar féidir dó i bhfad níos mó a dhéanamh ná mar a d'iarrfaimisne nó smaoineamh féin air, tríd an gcumhacht atá ag obair ionainn. ²¹Glóir go raibh aige san Eaglais agus i gCríost Íosa ó ghlúin go glúin go brách na breithe. Amen.

Aontacht

4 Táim ag impí oraibh, dá bhrí sin, agus mé i mo ghéibheannach ag an Tiarna, bhur saol a thabhairt go cuí de réir na gairme atá faighte agaibh ²agus sibh a bheith lán d'uirsle, de láchas agus d'fhoighne. Cuirigí suas go carthanach le chéile ³agus déanaigí bhur



ndícheall chun an aontacht a thagann ón Spiorad a choimeád faoi cheangal na síochána.

⁴Aon chorp amháin agus aon Spiorad amháin atá ionaibh faoi mar nach bhfuil ach aon dóchas amháin agaibh ó fuair sibh bhur ngairm ó Dhia. ⁵Níl ann ach aon Tiarna amháin, aon chreideamh amháin agus aon bhaisteadh amháin. ⁶Níl ann ach aon Dia amháin atá ina Athair ag cách: é os cionn cách agus ag gníomhú i gcách agus istigh i gcách uile.

⁷Ach tá a thabhartas féin faighte ag gach duine ar leith againn de réir mar a riar Críost orainn é, ⁸faoi mar a deir an scríoptúr:

“Ar dhul in airde dó,
ghabh sé slua cimid
agus thug tabhartais do dhaoine.”

⁹Cad tá le tuiscint as an “dul in airde” sin ach gur tháinig sé anuas chomh maith ar an domhan íochtarach seo? ¹⁰An té sin a tháinig anuas, is é an duine céanna é a chuaigh thar na flathis uile amach chun go líonfadh sé an chruinne cheathartha. ¹¹Agus is eisean a thug do dhaoine áirithe bheith ina n-aspail, do dhaoine eile bheith ina bhfáithe, do dhaoine eile bheith ina soiscéalaithe, agus do dhaoine eile fós bheith ina n-aoirí agus ina múinteoirí, ¹²d’fhonn na naoimh a chur in oiriúint dá ndualgas, mar atá, corp Chríost a thógáil mar theach; ¹³go dtí go mbeimid go léir tagtha chun aontacht chreidimh agus chun aontacht eolais ar Mhac Dé nó go mbeimid tagtha in inmhe, ar chomhchéim le Críost féin agus é i mbun a mhéide.

¹⁴Ní bheimid inár naíonáin feasta, dár luascadh i measc na dtonn agus dár gcaitheamh anonn agus anall ag gach leoithne theagaisc dá séideann le cealg dhaoine agus a chlisteacht atá siad chun duine a sheoladh ar a aimhleas. ¹⁵Má leanaimid den fhírinne le



teann grá, áfach, fásfaimid suas i ngach slí nó go ndéanfar dínn Críost, is ceann orainn.

¹⁶Mar is é a bheir don chorp a bheith fite fuaite ina chéile le cabhair gach nasc dá bhfuil ag fónamh dó, agus, de réir mar a bhíonn gach ball ag gníomhú mar is cuí, fásann an corp iomlán agus téann i méid sa ghrá.

An Seansaol agus an Saol Nua

¹⁷Is é a deirim libh, mar sin, in ainm an Tiarna, gan bhur saol a chaitheamh ar nós na bpágánach a mbíonn a n-aird ar nithe baotha, ¹⁸a bhfuil scamall ar a n-aighe, agus iad dealaithe amach ó bheatha Dé de dheasca a gcuid aineolais agus chruas a gcroí. ¹⁹Le barr patuaire tá siad tugtha suas don drabhlás agus do gach sórt graostachta a chleachtadh gan srianadh.

²⁰Ní mar sin a chuir sibhse eolas ar Chríost, áfach, ²¹má éist sibh leis i gceart agus más í an fhírinne atá in Íosa a múineadh daoibh. ²²Agus is é teagasc a fuair sibh bhur seansaol a chaitheamh uaibh, an sean-nadúr a bhíonn á thruailliú ag ainmhianta claona;

²³athnuachan a dhéanamh ar bhur meon agus ar bhur n-aighe ²⁴agus an nadúr úrnua a ghabháil chugaibh, an nádúr a cruthaíodh in íomhá Dé ar fhíréantacht agus ar naofacht fhíor.

²⁵Cuirigí uaibh an t-éitheach, dá bhrí sin, agus labhraígí an fhírinne lena chéile, gach duine agaibh, mar is baill dá chéile sinn. ²⁶Más ea féin go dtagann fearg oraibh, ná déanaigí an peaca dá bharr, ²⁷agus ná maireadh an racht thar luí na gréine le heagla go dtabharfadh sibh áiméar don diabhal.



²⁸An té a bhíonn ag goid, ná déanadh sé goid níos mó ach bíodh sé ag obair go macánta lena dhá lámh féin ionas go mbeadh rud aige le roinnt ar an té atá ar an ngannchuid. ²⁹Ná tagadh oiread agus drochfhocal amháin as bhur mbéal ach an dea-fhocal fointeach a oirfidh don ócáid agus a rachaidh chun sochair don lucht éisteachta. ³⁰Ná cuirigí brón ar Spiorad Naofa Dé a bhfuil a stampa buailte oraibh i gcomhair lá na fuascailte. ³¹Cuirigí uaibh ar fad an ghangaid, an ghoimh, an fhearg, an callán, an t-achasán mar aon le gach mioscais. ³²Bígí muinteartha le chéile agus atruach, ag maitheamh dá chéile faoi mar mhaith Dia daoibh féin i gCríost.

Maireachtáil faoin Solas

5 Déanaigí aithris ar Dhia mar gur sibh a chlann mhuirneach, ²agus mairigí de réir an ghrá faoi mar a ghráigh Críost sinne agus a thug é féin suas ina o fráil chun Dé agus ina íobairt chumhra ar ár son. ³Maidir le drúise nó graostacht d’aon sórt nó saint, ná luaitear in bhur measc iad fiú amháin, mar ní healaí do na naoimh iad. ⁴Ná bíodh agaibh ach oiread an drochchaint ná an tseafóid ná an magadh, nithe nach n-oireann; ag gabháil buíochais do Dhia ba chóra daoibh a bheith. ⁵Bíodh a fhios seo agaibh: duine ar bith atá tugtha don drúis nó don mhígheanmnaíocht nó don tsaint – rud is ionann agus íoladhradh – níl aon pháirt aige i ríocht Chríost agus Dé.

⁶Ná mealladh aon duine sibh le hargóintí baotha, mar sin iad na peacaí a tharraingíonn fearg Dé anuas ar lucht na míréire. ⁷Ná bíodh aon bhaint agaibhse lena leithéidí; ⁸mar ní raibh ionaibh tráth ach dorchadas, ach is solas anois sibh sa Tiarna. Iompraigí sibh féin,



más ea, ar nós clann an tsolais –⁹bíonn toradh an tsolais le feiceáil san uile shórt maitheasa agus fíréantachta agus fírinne. ¹⁰Aimsígí cad é an ní is áil leis an Tiarna ¹¹agus ná bíodh aon pháirt agaibh i ngnóthaí seasca an dorchadais ach iad a cháineadh. ¹²Mar is náireach le lua féin na nithe a dhéanann siad faoi choim. ¹³Gach uile ní a nochtar faoin solas, áfach, éiríonn sé follasach ¹⁴agus gach ní a bhíonn follasach, bíonn sé ina sholas. Sin é an fáth a ndeirtear:

“Dúisigh a chodlatáin!
Éirigh ó na mairbh
agus lonróidh Críost ort.”

¹⁵Bígí cúramach faoi bhur gcuid iompair, dá bhrí sin, agus gan a bheith ar nós daoine gan chiall ach ar nós daoine ciallmhara ¹⁶ag cur na huaire chun sochair, mar is olc iad na saolta seo. ¹⁷Ná bíodh aon mhearbhall oraibh, dá bhrí sin, ach tuigigí go cruinn cad is toil don Tiarna.

¹⁸Agus ná bíodh meisce fíona oraibh mar níl ansin ach drabhlás, ach bígí lán den Spiorad, ¹⁹ag rá salm agus iomann agus laoithe spioradálta le chéile, ag cantain agus ag salmaireacht chun an Tiarna in bhur gcroí istigh, ²⁰ag gabháil buíochais gan stad le Dia an tAthair ar son an uile ní in ainm ár dTiarna Íosa Críost.

Fir agus Mná

²¹Bígí géilliúil dá chéile le hómós do Chríost. ²²Bíodh na mná umhal dá gcuid fear mar a bheidís don Tiarna, ²³mar tá an fear ina cheann ar a bhean ar nós mar atá Críost ina



cheann ar an Eaglais agus ina shlánaitheoir ar an gcorp. ²⁴Faoi mar atá an Eaglais faoi smacht Chríost, ar an dála céanná bíodh na mná faoi smacht a gcuid fear i ngach ní.

²⁵A fheara, bíodh grá agaibhse do bhur mná faoi mar a bhí grá ag Críost don Eaglais agus thug suas é féin ar a son d’fhonn í a choisreacan do Dhia . ²⁶Rinne sé í a íonglanadh le briathar i bhfothragadh an uisce ²⁷d’fhonn í réiteach dó féin ina hEaglais niamhrach, gan smál ná roc uirthi ná aon ní dá shórt ach í naofa gan cháim. ²⁸Go deimhin, tá d’fhiacha ar na fir a mná a ghráú mar a ghráíonn siad a gcolainn féin, mar an té a thugann grá dá bhean is dó féin a thugann sé grá. ²⁹Ní raibh aon duine riamh a thug fuath dá cholainn féin; is amhlaidh a dhéanann sé í a chothú agus a chumhdach faoi mar a dhéanann Críost don Eaglais, ³⁰de bhrí gur baill dá chorp sinne. ³¹“Mar sin de, fágfaidh duine a athair agus a mháthair chun bheith dlúth i bpáirt lena bhean agus aon cholainn amháin a bheidh sa bheirt acu.” ³²Is mór an rúndiamhair í seo, ach is á tagairt atáimse do Chríost agus don Eaglais. ³³Ar aon chuma grádh gach duine agaibhse a bhean mar é féin agus tugadh an bhean ómós dá fear.

Tuismitheoirí agus Leanaí

6A leanaí, bígí umhal do bhur dtuismitheoirí, sa Tiarna, mar is é an ceart é. ²“Tabhair do d’athair agus do do mháthair onóir”; sin í an chéad aithne a bhfuil gealltanais ag dul léi: ³“ionas go mbeadh an rath ort agus go mbeadh saol fada ar talamh agat.” ⁴Agus sibhse, a aithreacha, ná déanaigí bhur leanaí a chiapadh, ach iad a thógáil faoi oiliúint agus smacht an Tiarna.



Máistrí agus Seirbhísigh

⁵A sheirbhíseacha, bígí umhal ómósach do bhur máistrí saolta le dílseacht chroí mar a bheadh sibh do Chríost féin, ⁶agus gan bheith ag súilseirbhís ar nós lucht lútála ach sibh ag déanamh toil Dé ó chroí mar a dhéanfadh seirbhísigh Chríost. ⁷Déanaigí bhur ndualgas le fonn amhail agus dá mba don Tiarna a bheadh sibh ag seirbhís agus nach do dhaoine, ⁸agus a fhios agaibh, cibé ní fóna a dhéanann sibh, go bhfaighidh gach duine, saor nó daor, a chúiteamh ón Tiarna.

⁹Agus sibhse, a mháistrí, déanaigíse mar an gcéanna dóibh; caithigí uaibh an bhagairt agus bíodh a fhios agaibh go bhfuil an Máistir céanna agaibhse agus acusan ar neamh agus gur cuma leis siúd duine seachas a chéile

An Cath in aghaidh an Oilc

¹⁰Mar bhuille scoir, téigí i neart sa Tiarna le fuinneamh a chumhachta. ¹¹Cuirigí iomaibh cathéide Dé chun bheith in ann seasamh in aghaidh chealga an diabhail. ¹²Mar ní le naimhde daonna atáimid i ngleic ach le tiarnais agus cumhachtaí agus rialtóirí domhain seo an dorchadais, le hainspridí na bhflaitheas. ¹³Gabhaigí cathéide Dé chugaibh, dá bhrí sin, i dtreo nuair a thiochfaidh lá an oilc, go bhféadfaidh sibh an fód a sheasamh, agus go mbeidh sibh fós in bhur seasamh tar éis daoibh an cath a bhaint ar an iomlán. ¹⁴Seasaigí go daingean, dá bhrí sin, agus an fhírinne fáiscithe faoi bhur gcoim agaibh mar chrios, an



fhíréantacht mar lúireach ar bhur n-ucht ¹⁵ agus fonn leata dea-scéal na síochána mar bhróga ar bhur gcosa agaibh.

¹⁶ Gabhaigí chugaibh i gcónaí an creideamh mar sciath lena bhféadfaidh sibh gach diúracán dearg de chuid an namhad mhallaithe a mhúchadh. ¹⁷ Glacaigí an slánú mar chlogad agus briathar Dé mar chlaíomh ón Spiorad.

¹⁸ Agus bígí ag guí le hurnaí agus le himpí gach uair faoi luí an Spioraid. Fanaigí in bhur ndúiseacht chuige sin ag guí go buanseasmhach ar na naoimh uile. ¹⁹ Agus guígí ormsa chomh maith, le hionchas, nuair a osclóidh mé mo bhéal, go dtabharfar dom labhairt go dána agus rún an dea-scéil a fhógairt – ²⁰ an dea-scéal a bhfuilimse i mo thoscaire air agus mé faoi ghlas féin; guígí go ndéanfaidh mé é a fhógairt chomh dána agus is cóir.

Beannachtaí Deireanacha

²¹ Tabharfaidh Tichiceas, mo chara ionúin agus mo chúntóir dílis in obair an Tiarna, faisnéis iomlán daoibh fúmsa ionas go mbeidh a fhios agaibh conas táim agus conas atá ag éirí liom. ²² Táim á sheoladh chugaibh d'aon ghnó chun fios mo chúrsaí a bheith agaibh agus chun sólas a chur ar bhur gceoí.

²³ Go dtuga Dia an tAthair agus an Tiarna Íosa Críost síocháin agus grá mar aon le creideamh do na bráithre uile. ²⁴ Go raibh grásta ar chách a bheir grá buanmharthanach dár dTiarna Íosa Críost.

